



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

UN Secretary-General Antonio Guterres-i kümsük tanabuba inyakner

TAPAK 3

Dhulia-i GHC indang Chief Justice ama tenangzüktep agiogo

VOL. XVIII NO. 88 (ADOK 88) DIMAPUR

SANGTENNÜ (TUESDAY) AENJETI (JANUARY) 12, 2021

₹ 5.00

Feb 12 nungi NLA session tenzüksü

Dimapur, January 11 (TYO): Nagaland Governor-i February 12, 2021 nungi 13 buba Nagaland Legislative Assembly indang Session Tenetbuba alitsü jazükogo, ta Commissioner &

Secretary NLA, Dr. P.J. Antony-i metetdaksü. February 12, 2021 anepdang 9:30 ako nungi Assembly Hall, Kohima nung assembly session tenzüksü, ta paisa ashi.

COVID-19 Nagaland: Nisung 107 dang kümogo

Kohima, January 11 (TYO): Hombarnü Nagaland nung nisung 9 dak COVID-19 aliba putet aser 16 taneptsü angu.

"Tanü nisung 9 dak COVID-19 aliba putetogo. Parnokji Kohima nung 7 aser Dimapur nung 2 lir. Külén, nisung 16 taneptsü angu. Parnokji Kohima o Mokokchung nungi pungugu (5) aser Dimapur o Peren nungi asemsem (3) lir" ta Health & Family Welfare Minister, S Pangnyu Phom-i metetdaksü.

Nisung 11,987 rongnungi nisung 11,655 taneptsü nguogo aser 107 anepaludar, ta paisa ashi.

Nagaland nung COVID-19 nungi taneptsü angubaji 97.3% lir, ta Health & Family Welfare Department Director, Dr Denis Hangsing-ia

metetdaksü.

"COVID-19 puteta alir nisung 85 asü. Tasürtem rongnung parnok 74 coronavirus ajanga asü, 10 tanga tashidak ajanga aser ka asüba kuli bushisüngdang südar. Külén, nisung 140 tashi tanga state temi ogo" ta paisa ashi.

District balala nung COVID-19 putetba: Dimapur (6,437), Kohima (3,728), Mon (604), Peren (504), Tuensang (244), Mokokchung (182), Zunheboto (142), Phek (47), Kiphire (41), Wokha (39) aser Longleng (19). Nisung 11,987 rongnung Traced Contacts 4,916, armed forces personnel 4,658, tanga state tem nungi arur 1,845 aser Frontline Workers 569 lir, ta Dr Hangsing-isa ashi.

(Maneni tapak 2 nung...)

BPCC(A-N) Tir tasen shimogo

Nakachari, January 11 (TYO): Arrtsülen alirtemi timtem ajuruba repringshimsü atema Border Peace Coordination Committee (Assam-Nagaland)-i taoba tir asür B.P. Bora'er kidang senden ka menogo.

Asür B.P. Bora'er ki ya Jorhat district kübok Darikial Gaon, Nakachari nung lir.

Jorhat district kübok Nagajanka Tea Estate aser Mokokchung district kübok Ao senden village nung mangatettep kar adokba ajanga Assam NGO temi Mariani-Mokokchung NH702D anogo 22 mokdangba indang onük tanü senden nung benoka lemsatep.

Iba mapang senden nung adenertemi mangatettepi arrtsülen alirtemi masü saka tibelemba tamajung abener nisung kari adokdaksüba liasü ta ashi.

Arrtsülen alirtemi iba amala mapa tamajung inyakertem noktangsü atema kanga kümdanga alitsüla ta senden nung adenertemi metetdaksü.

BPCC(A-N) tir teinyakdak nung April 17, 2019 nü B.P. Bora asüba

sülen BPCC(A-N) nung Working President inyaksü atema Jiten Buragohain shima liasü aser tanü senden nung pa President inyaksü mulunga shimogo.

BPCC(A-N)-i Saringyim village nungi züngsem ka aginüa liasü aser village council-i ashiba nung ajemdaker Nagaland tsütsü nungi Executive Member inyaksü atema Rongsenjungba Imchen shim.

Maneni, Vice President, BPCC(A-N) inyaksü atema tang teinyakdak Executive Member O. Sangpang Longchar shimogo aser iba osang Saringyim Village Council dangi abentsü lemtet.

Senden nung Coordinator BPCC(A-N) menden liasü, Assam Valley Baptist Mission Evangelist, Huni Gogoi-i temoatsü meshia sarasadem, Vice President, BPCC(A-N) Imsu Jamir-i okila jemi aser President Jiten Buragohain-i anküp tepela o jembia liasü.

Jiten Buragohain-i züngsem ajak dang 'Nü Kidanger meimang' ta asüba BPCC(A-N) omen nung ajemdaker inyaksü ayongzük.

Mizoram nung 'Missionary Day' among

Aizawl, January 11 (Agencies): 1890s nung Wales nungi missionary ana Mizoram-i aruba sülen küm 127 ajungba bilemteta Hombarnü "Missionary Day" mongogo.

Mizoram sorkari iba anogo meshiteta amongtsü atema public holiday ka sangdonga liasü aser tanü nung sorkar office ajak den shishilembadak aika shibanger iba anogo among.

Tanü arogo kar nung aser Aizawl nung aliba McDonald Hills nung J.H. Lorrain aser Rev. F.W. Savidge indang nüngshilungtem nung sarasadem sentong ayonga agi.

1894 küm Welsh missionary ana Lushai Hills nung tetsüng ajemokba bilemteta tanü nisungtemi tena nem tetushi agütsü.

Taoba mapang missionary day nung arogo temi lokti sentong balala

ayongzüka agi saka takümbo Covid-19 ajanga sentongtem magitsü noktang.

Mizo nungeri Rev JH Lorrain dang 'Pu Buanga' aser Rev FW Savidge dang 'Sap Upa' ta ajar aser tena ya January 11, 1894 nü Assam nungi rong ka nung Sairang yimtsüng anasa Tlawng ayongküm atong.

Tenati Khristan yimsü prokshi aser iba ajanga Mizo nunger ajak tamangba yimsü taseni meyipa liasü.

Tenatisa Roman script amshia Mizo alphabets adoker shisaluyimba maparen inyak.

Baptist Church of Mizoram (BCM)-i 1971 nungi Missionary Day amongtsü tenzüka liasü aser külén Presbyterian Church-i 1974 nungi tenzüka among.

Dimapur nung Aortemi nübortem anisüngzükdak ki ka yanglutsü



January 11, 2021 anogo nung Dimapur District Hospital nung Dimapur aser temeket nung aliba Ao Baptist Arogotem aser Aor lokti tentetemi longjemer yanglutsüba Multi Public Utility Centre meshiteta sarasademtsür külén Rev.L. Kari Longchari Medical Superintendent nem bendanga agütsüba noksa nung angur .

Dimapur, Jan.11 (TYO) : Dimapur aser temeket nung aliba Ao Baptist Arogotem aser Aor lokti telongjentem longjemer Dimapur District Civil Hospital nung nübortem anisüngzüka mena kazüdak aser metsümeshidak ki tajung tuluka yanglutsüogo.

Tanü iba ki meshitetba sentong nung taoba ABAM Executive Secretary, Rev.L.Kari Longchari Tsüngrem nem tenüngsang agüja sarasadema iba ki meshitettsü. Paisa Ao arogotem aser lokti tentetem nung lenirtemi nübortem anisüngzükdaksütsü bilema tangatetba tajung agi mulungsua mapa tajung inyakba asoshi tenüngsang agütsü aser ano maneni Naga nunger asoshi Aortemi mapa tajung inyaksü ajungshi.

Kasa sentong nung tepela o

jembidang, “ yaküm 2020 küm ya Covid-19 tashidak wara agi alima ajunga kangshiba küm tamajung ka liasü saka Dimapur nung Ao arogotem aser lokti tentettem longjemer tashidak wara tesashi nokdangba maparen nung quarantine center asem tashi lapoka takok ngua inyakogo,” ta Dimapur Area Ao Baptist Churches & Civil Societies Co-Ordination Committee on Covid-19 nung tayonger Wb.Supu Jamiri metetdaksü. Item quarantine center asem nung bendanglen nungi arur kin temeyoktep nungi nisung ajak agi 245 anendakja liasü aser Tsüngrem taochi agi parnok shinga daka Covid-19 tashidak meputeti anogo 20 tashi quarantine center nung monger pei kidangi meyipa odaksü. “Item quarantine nung amongertem jagi June 5, 2020

nü alima lipüküm anogo nung Dimapur college temeket nung süngdong 100 temtsüba kanga junga meidagi aser parnokisa temulunger tenla saruteper onok nem sen Rs.43,361 agütsü, iba jagi onok mulungjang nung kanga kongshia pelatep aser iba senji enoksema iba ki ya yangluogo,” ta paisa metetdaksü.

Covid-19 wara poktetba tensa tamajungtiba mapang ka nung, Tsüngrem dak dang imlaa arogo aser lokti lenirtem longjemer quarantine center anepalutsü tenzüka mapang arogo, lokti, kija aser kibongtemi tenla agütsüba agir magima anüng, anungji item senji amshia iba “ Multi Public Utility Centre” ki ya sen lakh tersh endoka renemogo ta Wb. Supu Jamirisa ashi.

(Maneni tapak 2 nung...)

Nagaland nung COVID-19 vaccine agütsütsü renema lir

Kohima, January 11 (TYO): January 16, 2021 nungi Nagaland nung COVID-19 vaccine agütsüba maparen tenzüksü renemogo.

"Linük den külema Nagaland nunga January 16 nungi COVID indang vaccine agütsütsü. India sorkari vaccine ji agütsütsü" ta Planning & Coordination, Land Revenue & Parliamentary Minister, Neiba Kronu-i ashi. Pa ya High Powered Committee (HPC) on COVID-19 Nagaland atema otongdar lir.

Vaccine agütsüba mezüngbuba shilem agidang, tongtipangba telemsaji health care workers asütsü, parnok sülen police aser administration aser tasembuba nung arishi küm 50 ser tempapur aser tashidak aliba arishi küm 50 ser teküpokpur asütsü, ta Minister Kronu-i metetdaksü.

"January 16 nungi tenzüker sorkar aser nija sector nung healthcare workers 19,690 nem

vaccine agütsütsü. Frontline workers 30,000 shi ka lir aser arishi küm 50 ser tempapurtemji 3,49,757 lir. Tang tashi nung arishi küm 50 ser teküpokpurtemi ano mezüngdangtet lir" ta paisa ashi.

COVID-19 vaccine anaji COVISHIELD aser COVAXIN lir, ta paisa shisem.

Prime Minister Narendra Modi aser Union Home Minister nati HPC on COVID-19 den video conference ka agiogo, ta Minister Kronu-i ashi.

Iba senden nung Chief Minister Neiphiu Rio den Health & Family Welfare Minister S Pangnyu Phom, Advisor & co-spokeperson Mmhonlumo Kikon, Advisor Neikisalie Kire, Health & Family Welfare Department ketdangsürtem aser pa aden, ta paisa metetdaksü.

Senden nung Nagaland nung COVID-19 vaccine agütsütsü aliba dak sendakba onüktem lemsatep, ta Kronu-isa shisem.

Centre-i vaccine sen agütsütsü:

Dzukou morok mi ajunga remsepogo

Kohima, January 11 (TYO): Dzukou tzükong nung tesüiba anogo pezü tsüingda mi tasen kecha madokba ajanga Nagaland State Disaster Management Authority (NSDMA)-i IAF Helicopter ajak yutsütsü telemtetba agiogo. Ajisüaka, ali nung mapa inyakertembo base camp nung amongtsü.

"Base camp nungi mi tasen adokba mesüra mokozi alongba mangu aser IAF helicopter temia anüng nungi kasaji nguogo. Anungji Dzukou tzükong nung mi remsepogo" ta Kohima Divisional

Forest Officer, Rajkumar M-i ashi.

Hombarnü Principal Secretary & Home Commissioner Nagaland, Abhijit Sinha menden ser Dzukou morok mi dak sendakba senden ka menogo.

Iba senden nung Commandant NDRF Rajesh Thakur, Deputy Commissioner Kohima Mohammed Ali Shihab A, SP Kohima Manoj Kumar, DFO Kohima Rajkumar M aser ADC Kohima Lithrongla Tongpi Rutsa nungertem aden.

Senden nung Dzukou morok mi dak sendakba osangtsüsang ajak metetpela aser mi remsepba atema

pelaba metetdaksü.

Mongulbar nungi base camp nung NDRF team 5 mapa lemezükja aliba anentsü. Ajisüaka, District Executive Force Kohima, Forest Department aser Southern Angami Youth Organisation volunteers 30-40 tashi taruba anogo ishika base camp nung amongtsü lemtet.

India Air Force (IAF)-i tanü Dzukou base camp nungi NDRF aser SDRF indang mi remsepang amshiba osettem Jakhama Military Helipad-i belenogo ta PRO Defence (Kohima) Lt Col Sumit K Sharma-i metetdaksü.

Tuensang nung Multi Skilled Handyman Training programme tenzükogo



Dimapur, Aenjeti/January 11 (TYO): Department of Employment, Skill Development & Entrepreneurship Tuensang-i teyari agütsüba Multi Skilled Handyman Training programme January 11 nü Town Hall Tuensang nung tenzükogo. Iba sentong ya Zynorique Initiatives Society (ZIC) den longjemer agidar.

Iba training ya anogo ter agitsü, kong Plumbers, Tiling aser electricians training agütsü. Training tem Town Hall aser GHSS Thangjam Tuensang nung agitsü. Tanü iba training programme tenzükba sentong nung Ajit Kumar Verma IAS ADC Tuensang alakteta jaoker liasü.

District nung lanurtem nem parnok sempet arantgetshitsü atema maongka agütsüba atema Verma-i tenüngsang agütsü. "Iba project nung

trainees tem aser parnok tejangraba aser bendanga agütsüba tongtibangtiba lir aser iba ya mendeni training sentong tajangzük makatsü," ta pai ashi.

Tuensang district ya kinük nung aliba tesem ka aser tesendaktep junga mali, kong industry aser company tulu maliba ajanga mapa inyaksü atema maongka agika mangur, anungji mapa mongui aliba lanurtem atema mapa angazüksü aser peisasa ayanga chiyongsü asoshi iba amala Skill Development training tem kanga tongtibang lir, ta pai ashi. Paisa, mapa angazüksü koda tongtibang iba indang lemsatepba den trainees tem dang mapa inyaksü asoshi tejangraba alitsüla aser mapa angutsü atema sentong tatongi yanglutsü nüngdaker, ta ashi.

Kasa mapang nung Ar. Richard Belho ZIS-i, okila

jembiba mapang trainees tem dang sorkar mapa angutsü ataa makazüi peisasa inyaksü atema mapa angazüksü ajungshi. Linük yangertsü ya tasodang nungi asen mapa lir saka Naga nungertem mapa inyakba yimya samaogo aser ibayongji asen state yangerba nung asenoki teyari magütsüteter, ta pai ashi.

Training dak sendakba nung pai ashiba agi, Iba sentong ya skill agütsü atema tanga sentong dang nungi balaka lir, ajita asünungdang nisung ka mapa inyaksü atema shilem aika agitettsü. Iba sentong ya jenjang balala lemsar agitsü aser trainees tem nem training tembangba sülen hadir dena agütsü sorkar renema lir, ta pai ashi.

Training programme lapokba sentong ya Er. Netenba Ajem Vice Principal ITI Tuensang lenisüba kübok agi.

K.T. Sükhalu-i Zunheboto nung Rostrum lapoktsü

Dimapur, Aenjeti/January 11 (TYO): Advisor, School Education, K.T. Sükhalu-i January 11 nü LADP project kübok public ground Zunheboto nung kanga dang nüngdaka aliba rostrum ka lapoktsüogo. Iba sentong nung Deputy Commissioner, Peter Lichamo den sorkar ketdangzürtem, lokti lenirtem, Arogo tenzükertem, party worker aser kaketshir lokti tentet lenirtem dena liasü.

Sentong nung o jembiba

mapang Advisor-i, iba mapa nung densema alirtem aser talisa Toniho Chishi shibai maparen ajak achaayanga liasü, parnok nem tenüngsang agütsü. Senior Pastor retd, SBCZ, Rev. Dr. Yevito Jimo-i bendanga agütsü sarasadem agia liasü.

Kasa anogo Zunheboto Area Sports Association-i achaayanga 33buba Kukami trophy tenzükogo.

Asayamung lapokba sentong nung alakteta jaoker ama o

jembiba mapang K.T. Sükhalu-i, asayartem dang saisapong ya professionally agitsü ajungshi. Naga nungertem nem asayatsü sempet aser asojen agüja lir aser saisapong nung renloka aotsü lenmang sadema lapoka lir, ta shia pai asayartem dang nükjiong tejangja ayutsü ajungshi.

Kukami trophy ya ZASA-i ayongzükba lir, kong yimtsüng 16 football, volleyball aser sobaliba asaya balala tokteper.

Rangapahar nung ex-servicemen rally ayongzükba agi



Kohima, Aenjeti/January 11 (TYO): Nagaland aser Manipur nungi NAGA Regiment veteran tem atema ex-servicemen rally ka 164 InfBn (TA) NAGA-i January 11 nü Rangapahar Military Station nung ayongzükba katsüogo.

Iba sentong nung KUMAON & NAGA Regt Lt Gen Rana Pratap Kalita, AVSM, SM, VSM, Col, GOC Spear Corps NAGA aser KUMAON Regt nungi officer aser sepaitem aser ex-servicemen, Veer Naris aser parnok kinungertem aika

aru denogo.

NAGA Regiment ex-servicemen aser Veer Naris tem timtem alibatem bentettsütsü, entitlement, benefits tem indang metetdaksütsü aser pension anomalies repringshitsütsü nükjiong nung iba sentong ayongzük.

Rally mapang Ex-servicemen Contributory Health Scheme (ECHS) & Canteen Smart Card update sütsüba den medical aser dental checkup süja liasü.

Maneni sentepa aliba lokti

dang state sorkar indang skill development programme tem aser parnok kinungertem Indian Army/Territorial Army nung züngoksemtsü atema inyakyimtem indang osang agüja liasü.

Iba rally ya Nagaland aser Manipur nung kinük nung aliba veteran tem shirnoki linük tenzükogo parnok tebilemtsü angadanga bentettsütsü atema Naga Regiment-i jenjang ka agiba lir, ta PRO (Def) Kohima, Lt Col Sumit K Sharma-i metetdaksü.

NBSE-i Saksham National Competition indang osang agütsü

Dimapur, Aenjeti/January 11 (TYO): Nagaland Board of School Education-i, züngoksema aliba institution tekolaktem dang sangdong ka ajanga Ministry of Petroleum & Natural gas, Govt. of India kübok Petroleum Conservation Research Association (PCRA)-i, online ajanga kaketshirtem atema Saksham National Competition 2020-21 ayongzükba metetdaksüogo. Iba sentong ya fuel conservation aser environmental protection dak sendakba nung tangazükba agütsü nükjiong nung 04-01-2021 nungi 10-02-2021 tashi agitsü.

Iba tetoktepba ya lanurtem nem industrial, transport, agriculture, domestic sector nung Petroleum product tem wazüka ayutsü atema, oil import conservation aser renewable energy sources amshitsü koda tongtibang iba indang tasatem agütsü aser item tasatem ya anogoshia liba liro nung benshia tzü-mopung koda wazüka ayutsü iba indang tangazükba agütsü nükjiong nung ayongzük

Tongtepratep junga sütettsü atema kaketshirtemi petroleum products wazüka ayuba aser mokozi tajemba kümdaksütsü atema parnok tasa aser

osangtem English, Hindi mesera pei oshi nung agütsütettsü.

Tetoktep asemji;

- Essay
- Painting
- Quiz for selecting school team and thereafter State and National level.
- Temsüa aliba kaketshirtem - Classes 7, 8, 9 & 10 kaketshirtem.

Tetoktepba nung takok angurtem nem senpet agütsütsü.

Iba tetoktepba ya Web Portal aser Mobile App ka ajanga agitsü. Kaketshirtemi benokbatem School temi asadanger tajungtiba ana PCRA indang webportal nung inoktsütsü nüngdaker. School temi tetoktepba ayongzükba agitsü aser online ajanga onüktem benoktsü atema osang tejangja PCRA webportal; www.pcracompetitions.org mesera website www.pcracompetitions.org mobile app [pcra-competitions](http://www.pcracompetitions.org) nung angutsü.

Institution tekola ajak dang, kaketshir tejangrartem nem iba osang agütsütsü mepeshia metetdaksüogo. Osang tejangjaba agitsü atema school temi PCRA Help Desk den Phone no. 011-26715360 mesera Email: contact@pcracompetitions.org ajanga tongteprateptettsü.

Namri Nchang-i Nsong yimtsüng Community Hall semzüksü



Namri Nchang-i, January 9 nü Tening Sub-division kübok Nsong yimtsüng Community Hall semzüksüdag agiba noksa angur. (IA Tening)

Dimapur, Aenjeti/January 11 (TYO): Advisor for Water Resources, Government of Nagaland, Namri Nchang-i, January 9 nü Tening Sub-division kübok Nsong yimtsüng Community Hall semzüksüdag.

Sentong nung Namri Nchang-i lanurtem dang tim lenmangi aotsü atema kaketshisatsü bushitsü ajungshi. Paisa, community hall mapang shidak nung tembanga yanglutsü atema meranga inyaba asoshi tenüngsang agütsü.

Sentong nung DC Peren, Sentiwapang Aier-i, sentepa

aliba lokti dang sorkar mapa dak metaloker melei peisasa senotsü lenmang bushitsü ajungshi.

Kasa mapang nung DRDA, Project Director Azenuo Pienyu-i, lokti mapa takok asoshi nüburttemi shilem agitsü koda tongtibang iba indang lemsatep. Maneni Tening Block Development Officer Kiengau Nda-i, iba community hall takok nung tembanga yanglutsü atema meranga inyaba asoshi tenüngsang agütsü.

Sentong ya NYO tir Kedawang lenisüba kübok agi aser lokti pelaa agizükba o Nsong Extra Assistant Commissioner Tumben P. Tsanglao-i jembia liasü.



Hombar anüngdang Silchar airport nung BJP national president JP Nadda arua anenzükba sülen pelaa agizükba angur. Tanü nungi BJP-i Silchar nungi Assam Assembly election nüboyimba sentong tenzükogo. Taküm Assembly election nung BJP-i menden 100 tema nung takok angutsü aser iba nungji Barak Valley nungia menden 10 nungbosa takok angutsü ta metetdaksüogo.

Minister Nath-i tesayurtem dang lungkak aitba anentsü ashi

Agartala, January 11 (Agencies): Tripura nung education minister Ratan Lal Nath-i lungkak aitba tesayurtem dang lungkak aitba anentsü atema ayongzükogo.

Deobarnü Nath-i lungkak aitba tesayur 10,323 dang sorkar mapatem atema interview agütsütsü renemtsü ashi.

Tripura sorkari Supreme Court dang lungkak aitba tesayurtem nem tajangzük kar agütsütsü ashi saka magizük.

"SC-i tetuyuba agütsüba agi ozü sorkari tesayurtem age

relaxation dak alaka tanga facility kecha magütsüteter. Onoki mapa nungi anentsüba tesayurtem atema aria bilemer saka parnok sorkar mapa angutsü atema interview agütsütsüla" ta paisa ashi.

2017 küm Tripura High Court-i tesayurtem mapa nungi anentsütsü tetuyuba agüja liasü.

Tang lungkak aitba tesayurtem ya taoba CPI(M) sorkar mapang mapa nung shimokba liasü.

"December 23, 2020 nü Tripura chief minister Biplab Kumar Deb den lungkak aitba

tesayurtem atema ajurutepogo" ta taoba education minister Tapan Chakraborty-i ashi.

"State sorkari parnok khuret atema telemtetba ka aginür, ta paisa ashi.

Tesüiba anogo 35 tashi mapa nungi anentsüba tesayurtemi Agartala yimdong nung lungkak aiter.

"CPI(M) sorkari item tesayurtem atema mapa 13000 adoktsüogo aser interview maparen tembangbogo. Sorkari parnok mapa nung shimoktsüla" ta Tapan Chakraborty-isa metetdaksü.

Meghalaya nung Covid19 vaccination atema mapa tenzükogo

Shillong, January 11, 2021 (Agencies): January 16, 2021 nungi tenzuka India nung Covid19 vaccine agütsütsü aliba anogo ishika tejakdang Meghalaya state sorkari Covid19 vaccination drive atema state indang tesem 11 shia nungi Health worker 100 indang list ka renemogo.

"January 16 nü nungi tesem 11 nung tesem shia nungi health worker 100 den vaccination drive sentong tenzüksü," ta principal secretary (health &

family welfare), Sampath Kumar-i ashi.

Mezüng anogo Health worker 1,1000 nem Covid19 vaccine agütsütsü, ta pai ashi.

Deobarnü CoWIN software dak sendakba nung Covid19 vaccine lema agütsüba asadangtsü atema health ministry-i states aser Union territories den virtual ajanga senden ka amen.

Covid19 vaccination drive ya healthcare workers aser frontline workers tongtibang

shilem asem nem mezüng maongka agütsütsü.

Iba sülen temulunger arishi küm 50 dak tema aser arishi küm 50 tekübok rogotem (shirangertem) sentepa nisung crore 27 jungnüa nem vaccine agütsütsü.

India nung Covishield aser Covaxin vaccine tem amshitsü melaogo. Covaxin ya Bharat Biotech aser AstraZeneca aser Oxford University indang Covishield ya Serum Institute of India ajanga yanglur.



2020-2021 tsüngda Manipur nung ozüngi memelaba poppy alu acre 1,420 tashi raksatsüogo ta Manipur Chief Minister N. Biren Singh-i ashi. State sorkari 'War on Drugs' mission tenzükba kübok iba mapa ya inyaker ta paisa shisem. (Imphal, January 11)

Taoba Manipur minister yiru; kinungtsü tsükset

Imphal, January 11 (Agencies): Deobarnü taoba Manipur Minister aser Manipur Pradesh Congress Committee Vice President, Moirangthem Hemanta Singh gari lendong ka nungi taküm jenbuogo saka pa kinungtsü Dr Pratita Moirangthem asü.

Kakching district nung taoba minister Moirangthem-i aniba SUV Bolero garii tanga gari ka den tsüktep ta osang ajanga

ashi. Moirangthem kinungtsü Dr Pratita Moirangthem ji RIMS Imphal nung tesayur ka liasü aser la idangjisa asü. Iba lendong atalokba sülen Moirangthem ji Kakching nung anepalu aser iba sülen Imphal nung mozü ki kati belen.

Yaküm Manipur by-election nung Moirangthem Hemanta-i Wangjing Tentha constituency nungi toktep saka takok mangu.

Cotton University-i Regional Red Ribbon Quiz nung takok angu

Guwahati, January 11, 2021 (Agencies): HIV/AIDS nung ajemdaker ayongba Regional Level Inter-state Online Red Ribbon Quiz Competition (Eastern Zone) nung Assam State tenüng nungi Cotton University team-i takok nguogo.

Eastern Zone kübok online sabang ajanga ayongba quiz tetoktepba nung Cotton University team-i Northeast aser West Bengal nungi team ajak madak takok angu.

Iba tetoktepba ya National AIDS Control Organization (NACO)-i ayongzük aser January 08, 2021 nü online ajanga agia liasü.

Taoba mapang, State Level Red Ribbon Online Quiz Competition nunga Cotton

University teloki takok angu. Plawan Sarma aser Raktim Ranjan Baishya nati Cotton University nungi shilem agi.

Iba state-level competition ya taoba küm November 10, 2020 nü Assam State AIDS Control Society (ASACS) ajanga ayongzük.

Tang, Assam State nungi Cotton University teloki National-level online quiz competition nung shilem agia tokteptsü terenemba lir, koba January 12, 2021 nü National Youth Day nung agitsü.

Assam telok den külemi national-level competition nung shilem agitsü asoshi tanga state teloktemji Rajasthan (Northern Zone), Daman Diu (Western Zone) aser Puducherry (Southern Zone) alitsü.

Dhulia-i GHC indang Chief Justice amatenangzüktepagiogo



Guwahati, January 11, 2021 (Agencies): Sudhanshu Dhulia-i Gauhati High Court indang Chief Justice ama mapa agizükogo.

Deobarnü Raj Bhavan, Guwahati nung Justice Sudhanshu Dhulia-i Gauhati High Court indang Chief Justice tasenba inyaksü atema tezüngzüktep agiogo.

Raj Bhavan indang Durbar Hall nung chief minister Sarbananda Sonowal matsüngdang Assam Angh tenüng nung Justice Nongmeikapam Kotiswar Singh-i iba tezüngzüktep sentong ketdangsüa agi.

Taoba mapang Chief Justice Ajai Lamba mapa nungi anenba sülen, September 20, 2020 nungi Nongmeikapam Kotiswar Singh-i Acting Chief Justice ama inyaka aru.

Assam chief minister Sonowal-i Chief Justice Dhulia nem tenüngsang agütsüogo.

"Ni pa (Dhulia) pelashishia agizüker aser pa nem latettsüba

kümsük piyong iba wadang nung pa dak aketba sempet tajungtiba amshia tenzüksü asoshi ni imlaa atar," ta chief minister Sonowal-i Twitter ajanga lemsatop.

Chief Minister dak alaka, iba sentong nung Assam law minister Siddhartha Bhattacharya, legal advisor to the chief minister Shantanu Bharali, Gauhati HC Judges, legal fraternity indang züngsemtem, state chief secretary Jishnu Barua, DGP Bhaskar Jyoti Mahanta aser tanga state sorkar ketdangsürtem aden.

Sentong atemba sülen Justice Dhulia-i Judges aser Registry indang tanga ketdangsürtem den sensaksema liasü.

Justice Dhulia ya Uttarakhand indang Pauri Garhwal kübok Lansdowne nung aso.

Dhulia ya Sainik School, Lucknow aser Allahabad University indang alumni ka lir.



TIR YIMYIM
YIMOBILEM (EDITORIAL)

DIMAPUR SANGTENNÜ, AENJETI (JANUARY) 12, 2021

AROK AJUNGTSÜ BILEMDI

Ozū ki topur tajung, temerūk aser tesadem saka ozū government mozū ki aser kaketreju kitembo topur majung, memerūk aser mesadem. Ozū kimabo naronū aser ozū ki aser alu lenmang dena tajung saka ozū lima yimti yimdongbo jana agi sünga lir aser ozū nübortem jajaba lenmang nungbo long, lishi, auyi aser tarok-taba agi garia karaa moutetter aser tetsüng agia sadema mejajatetter. Ozū chinurtem azüngba private school kitembo kanga tajung saka ozū nübor chirnurtem azüngba government school agi nümamedangtetter kechiyong kiji jara maket, menden kanga tejen aser tamajung aser tsüngbang jetzūka tsüker. Ozübo takar saka ozū government bo sensaker, ozū meyong kiojen aser osettsüset ajak tajung saka ozū government kiojenbo aser osettsüsetbo kibur maliba ki aser osetang mesük, techireper, talaor, teyanglupet aser song agi chimar. Iba amaji asenbo tajung saka asen limabo majung ta alitsübaji jangratemtsüka asü (?) ta tanübo asenok ajaki shisadangner. Talisa tang ama alima tashidak wara tamajung agi asenok amokmerenba mapang ya asen kija kümzüksü merangtsübajia tongtibang saka asen kija kümzüker kinunger aser yimtsür yimer ajak sümadokra, asen kija alima nung jangratema alitsü na (?) ta asenoki khen bilemdangdi. Aji oda, asen kija takar aser tulur kümer tangar ajak timtema alitsübaji asenok asoshi tepelatsüka asütsü na (?) ta khen shisadangdi. Alima topur ajungba ya tenem aser ayong aser süngdonglidongtem agi topur jungdaksür masü saka nisung o nisung na meimtepa putepa aliba agi jungdaksür. Kodang asenoki asen ki aser asen kima topur junga yunüba amaji asen yimti yimdong, asenok mozū ki aser mozū ki kima, asenok school ki aser asenok school ki kima, asen kiyong aser tangar kiyong ajak topur junga yunüa asen shisatsü, asen nübo aser asen rongsen endoka anepalu tenzükdir, idangji asen limaji tereprangnütsüka aser telinütsüka topur junga adoktsü. Atangji, asenoki arok ajungtsü bilema kanga temulung agüja inyakba mapa kaji tenla ki yangluba mapa ya asütsü. Asenoki tenla kibo sen aika jenjang kecha mekurui yanglur, aji junger, iba jagia alima topur jungdaksür. Iba amaji asenoki asen chirnurtem sen meindoki kaketshisatsü tajung angutsüsa, talisa, government mapa nung inyakertemi government school nung temulung agütsü nungbo aser government mozü kidang shiranger ajak kanga junga anepalutettsüsa government mozü kitem kümduksütet nungbo asen limaji kodaka topur jungla ! Alima topur tajung nung nisung ajak tesünep nung ayipjanga mejangtsü aser kecha marendaki pei ki meshibangyonga toktsür otettsüsa alitsübaji nisung ajaki arok ajungtsü bilema inyakba nungi tenzüksü. Atangji, ajaki shitak inyakyonga alima nung kar sensaker aser kar takar, kar tulur aser kar tilar ta alitsübaji alima yimya lir. Ajakbo takar mekümtet mesüra ajakbo sensaka malitsü, takar aliba agi sensaker alir aser sensaker aliba agi takar alir. Aji oda, takar aser tulurtemi sensaker aser tilar meimtsü aser sensaker aser tilartemi takar aser tulurtem akümtsüba tenzüksü ta ajaki arok ajungtsü bilema tenzüktepba jagia alima topur jungdaksür. Joko, asenok ajaki asen kima topur junga ayutsü bilemba ama asen yimti yimdonga topur junga ayutsü bilemdi . Kasa tangatetba nung tashidak menatepa maotsüsa aser nokdangtettsüsa asen aliba anasa government mozü ki junga ayutsüba nung asenokia shilem agidi. Iba kasa tangatetba nung arok ajungtsü atema government school anepalu tenzükti aser yimkong ajungtsüba maparen ajak nung asen tama ser temulung agüja inyakdi. Joko, tang yabo asen kija kümzükbaji masü asenia karbo kümzüksüla aser asen agitsü kija bilemtsübaji masü saka arok ajungtsü atema asen nübo aser asen rongsen agütsü tenzüksüla.

OLEMSABANG

HINDU YIMSÜI AZÜOKTSÜ MERANGBA MAPADONG

~ Wati Longchar (Serampore)

India nūjiso nguli nungi India ya Hindu lima asütsü nungdak ta nokdakba RSS teloki parnok nūkjidong atalokdaktsütsü asoshi BJP ya political tashikang ka ama tenteta bener arur asü nungji, tanü yimden yanglushiba nung Khristan teinyaktsü shilem tali tejangjaba angatettsü asoshi tongmelang agi yamai angatetdi.

- * India ya Hindu lima (Hindu state) ta agizüka, Hindu tesayuba nung yimden, Temzüng, tsüzüng-özüng, sobaliba ajak bener aotsü nokdaker. Muslim aser Khristan shirnoki Hindu yimsü magizüker aser sobaliba mebenshiner, aser shirnoki Hindu mejembir parnokji India nunger masü ta ashir.
- * India nung tamangba balala, sobaliba balala aser oshi balala malitsü. Ka dang alitsü. Lokti teimbai kechi benshir, tetezü Hindui, aji ajaki tashi angaa benshitsüla ta ashir. Anungji Hindu yimli (Hindu Rashtra) akang akanga yangertsü asoshi BJP-i aniba sorkari itemi inyaka arudagi aser inyaktsü merangtsü. Tatishitsü kar:
- * India nüjiso ngur Temzüng nung "secular democratic country" ta agizüka bener aru, saka "secular" ta zülua alibaji endoktsü asoshi nokdaker. India lima litsü tulukadang aser temeyoktep shilu aikati aküm nung, "secular" country ka asü nung dang tamangba yimsü balala, sobaliba balala, oshi-olem balala ajak kesasa ta agizüka, kati ka akhümtsüa aser senti ta angateta wazüka yutettsü. Saka ibaji indoker Hindu yimsü-yimpong dang amshia bener aotsü asoshi "secular" ta asübaji indoktsü meranger. Jammu & Kashmir nung Article 370 koba ajanga Muslim nunger kümzüka ayutsü asoshi tangar dang ali mayoktsü ta aliba agienogo. Nagaland aser tanga tribal statetem menua mali ta tetsübu o aika jembia arudagi.
- * Kaket riju azüoka ayutsü merangba. Tanü India nung kaket riju, Govt.i tenzüka dak alaka, RSS-i tenzüka Vidya Bharatya tulutiba aser teimba lir; 13,000 -15,000 kaket riju lir, 75,000 - 80,000 tesayur aser shisashir lakh 20 tema lir. Yangi Hindu tamang yimsü aser sobaliba sayur. Iba den Government school nunga text book Vedas-i sayuba ama, Hindu yimsü-yimpong, otsü-olem, sobaliba züngdaksür. Home Minister Amit Shah-i India nunger otsü, Hindu tangatetba tsütsü nungi zülushitsüla ta ashir aser tashi temeteter telok ka shimteta züludagi. Parnoki "Hindus are descendent of India's first inhabitants and Muslims and other minorities are not 'sons and daughters of the soil'" tangatetba nung zülur sayur. South India nung Darvidian aser North East India nung Mongoliod shilu ya züngdoker otsü zülushitsü meranger. Küm 300 tema Mughul yimsüsüba indang Indian history nungi aidoktsü merangba, tat. agi Taj Mahal, Lal Qila, Juma Masjid ya Saha Jahani yangluba masü, Hindu nunger chubai yanglu ta otsü meyipshir, aser Gujarat nung class 9-pur text book nung Yisu Khrista mojing (demon) ta zülua aliba angur. Teyazü otsüji sayupet sayu aser media balala nung teyazüi ochi maküm tashi shipet ashiba angur. Ashiko, putu ishika tsüngda nungbo tang koba teyazü otsü sayur ibaji ochi akümtsü. Naga nungera Nagaland nung yimpur masü, saka ainer amai kümstsütsü ana nung dang lir. Yamaji putu ishika tsüngda nung Hindu otsü dak alaka, tangar otsü-olem samadaksütsü nükjidong nung jaktaka inyakba aika angur. Tebilemtsü tulu.
- * India nung zülumen makartem dena tetsü oshi 19,500 tema lir. India nung tetsü oshi nisung 10,000 temai jembir tetsü oshi 121 lir ta ashir. Oshi aika meyokteper akümba country ka asü nung English, Hindi aser regional languages asemprongla jembitsü, sayutsü aser official maparen balala nung amshitsü melaa aru. Saka India lima ajak ka kuma lungjemdaksütsü aser alima dang Indiai iba tetsü oshi ya jembir ta sayutsü asoshi Hindi oshi angazükdaksütsü aser jembidaksütsü terenemba lir. India ya "Hindu, Hindi, Hindustan" ta alima dang sayutsüla ta ashir. Home Minister Amit Shah-i yamai ashi, "To preserve our ancient philosophy, our culture and the memory of our freedom struggle,...there is at least one language, Hindi, that the nation knows. If Hindi is taken out of our freedom struggle, the entire soul of the struggle is lost," Tetzü, tetsü-tobu otsü aser wainshin wazüka ayutsü asoshi Hindi ajaki jembitsüla. Hindi ajanga itemji wazüka ayur. Hindi jembiri nüjiso bener aru anungji Hindi mamatsüla ta ashirba. Hindi tetsü oshi ama jembiteter 22% dang aser 44% teraa bazar oshi amai jembiteter, saka Hindi mejembitetra, India nunger masü ta bilemba. Hindi jembitsü akhangba aser mejembitetra atalaa menütsüba aser mezüngmeshiba aika ajurur. School nunga Hindi aser Sanskrit dang sayutsü ta sür tanga tetsü oshi sendokba ngua arudagi. Kodang tetsü oshi samadir, kin ka ayak samar. Tetsü oshi ajanga sobaliba aser tamangba maparen ajak wazüka ayur. Kin ta telungjem oshi ajanga adoktsür. Ibaji samadaksütsü nükjidong nung maparen ajak bener aotsü meranger.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

1967 kûm sùlen tang mezüng Yordan anasa St. John Tenla kidang tekülem agi



Yordan ayong anasa St. John Tenla ki noksa nung angur

January 11, 2021: 1967 kûm Arab linüktemi Israel anema anogo trok raraba sùlen tang mezüng January 10, 2021 nü St. John Tenla kidang tekülem sentong agiogo.

Iba Tenla ki ya Yisu Khrista tzü nung baptiba ayong Yordan tzüyimkümlen lir. 1967 kûm Arab linüktemi Israel anema raraba mapang nung iba Tenla ki ya injang agi mejungi khasaja liasü. Iba Tenla ki

anasa ali telung nung bomb rema aliba 1,000 dak tema agiteta indokba sùlen tang mezüng iba Tenla kidang tekülem sentong agir.

1967 kûm rara nung Israel sepaitemi Yordan ayong nungi anüolen agi aser iba mapang nungjagi Israel sepaitemi West Bank agia liasü.

Iba rara mapang nung Tenla kitem aser temeshi tesemtem toktsü aser Israel

sepaitemi tsükchirtem anema ali telung nung bomb aika remja liasü. Tesüiba kûm ana tsüngda Israel-i iba tesem nung bomb ajak agiteta indokogo.

2011 kûm nungi iba ayong tzükümlen baptitsü atema temelaba agüja liasü saka bomb aika rema aliba agi atsü atsüdanger tesem tila ka nungdang baptitsüpurtemji jajadakja liasü.

Khristan meyrjang aikati Middle East kübok Lebanon toktsür ajener

January 11, 2021: Yaküm August ita nung Lebanon nung bomb lendong atalokba sùlen tang Khristan meyrjang aikati Lebanon linük toktsür jendar.

Catholic charity Aid to the Church in Need (ACN) den jembidang Beirut nung aliba Maronite Cathedral nung putir, Jad Chlouk-i, Khristantemi pei tetsü taso li nung nüburtemi sendoker ama bilemer, ta metetdaksü.

Arrshi kûm 38, Jad Chlouk-i, "European Union aser North America nung aliba linüktem nung jenoktsü atema aliba Embassies nung temepishiba shidi 380,000 dak tema agütsüogo aser parnok

Lebanon nung osangbenertemi ashiba agi, yaküm bomb lendong atalokba sùlen tanga linüktem nung oa alitsü atema temepishiba shidi agütsür 380,000 dak tema agütsüogo.

Putir Chlouk-isa Middle East linüktem nung Khristan nütsüng kanga ajema akümba lemsatepa liasü.

2003 kûm matongdang Iraq nung Khristan nütsüng million 1.5 liasü saka tangbo Khristan nütsüng 150,000 den tajemba lir. Syria linük nunga 2011 kûm Khristan nütsüng million 1.25 liasü saka 2017 kûm nungbo iba linük nung Khristan nütsüng lakh 5 den tajemba kûmogo.

timbaka Khristantem lir, kechiyong parnoki pei linük nung parnok joko ainertem ama bilemer," ta metetdaksü.

"Iba tangatetba ajanga Khristantem kongshir, kechiyong Khristantem aika samar, talisa yangi tarutsü nung Khristan yimsü bener aotsübur lanurtem aika samar," ta putiri ashi.

"Ibayongji linük nung anogo shia Khristan nütsüng tajemba-tajemba akümer aser tensa tamajungba tamajungba akümer, talisa linük medoktsürtem atema tensa tamajungba akümtsü, kechiyong kobi melii parnoki reshikangshi ajurutsü," ta pai metetdaksü.

Hebei nung Covid prokba atema Khristantem nem tai tonglochtsür

January 11, 2021: China nung Hebei province kübok nütsüng million 11 aliba yimti ka nung coronavirus tashidak ano maneni prokba sùlen January 6 nungi yimtij shibangogo.

Iba yimti nungji tanaben coronavirus tashidak prokbaji bendanger missionarty tem aser yangji aliba Khristantem ajanga lir, ta tai tonglochtsüba osang balala social media nung prokshioغو, ta International Christian Concern (ICC) osang ajanga metetdaksü.

Putir ka aser Arogo züngsem ka na tsüngda jembiba o-a social media nung kanga prokshi.

"Gaocheng anasa Xiao Guozhuang yim ya Catholic Khristantem yim ka lir; anogo

20 tejaklen yangji tamangertem sentong ka agia liasü aser iba sentong nungji Europe aser United States nungi missionary tem aika liasü," ta social media nung prokshi. Tetezü Hebei province nung ano coronavirus tashidak prokbaji Khristantem ajanga lir, ta tai tonglochtsütsü mechi nung iba osang prokshi, ta angateter.

Ajisüaka putiri ashiba agibo, tai tonglochtsüba yimtsüngtem nungji Khristantem mali aser yaküm Khristmas mapang (December 24-25, 2020) nungi tenzüka sorkar ketdangsertemi tamangba yimsü dak sendakba sentong ajak nokdangogo.

Iba dak alia Shijiazhuang nunga putir kati, "Xiao Guozhuang, Liu Jiazuo aser

Nan Qiaozhai yimtsüngtemji Khristantem yimtsüng masü, item yimdak Catholic Khristan ishika dang lir. Item yimtsüng nung Catholic Khristantem sarasademtsü mesüra Tsüngrem külemtsü atema tesem mali, aser parnoki tekülem sentongtem ayongzüka magir. Tekülem sentong nung adentsü atema parnoki anasa aliba Bei Qiaozhai yimdaki dang aoer," ta metetdaksü.

Ketdangsertemi December 24 nungi tenzüka tamangba yimsü sentongtem nokdanga liasü, aser Patriotic Association & Administrative Commission [China nung National Catholic Arogo]-ia lenirtem dang tekülem sentongtem magitsü metetdakja liasü.

ANOGO ABEN TSÜNGREM DEN

Tsüngremer tenangzükbatem amen
2kor.1:20

Tsüngremi pa nangzükbatem ayur. Kodang Khrista den telungjem nung jajadir Laishiba nung Tsüngremi nangzüka aliba ajak tejangja asenok den lir. Iba ochi jagi tenangzüka shiaji Laishiba nung bushitsü asoshi asenok ajungmesor.

Kodang nenoki kü tenüng nung langka meshidir pai aji inyaksü ta Yisui nangzü. (YN 16:23b). Iba tenangzüka ya Khristan shia asoshi lir. Nai Tsüngrem dang asündangra iba tenangzübaji amen ta lir. Na tang iba tenangzükbaji ne taküm nung majangshiaka iba jagi Tsüngremi ashibaji memelenshir. Kechi Tsüngrem tenangzüka ne dak mamonger ta nai Tsüngrem bushitsü akok. Pauli tenangzüka ajak pa taküm nung tentanger ajaki ochi ta kuli asü. Iba yong Yisu Khrista nung Tsüngrem taochi kanga takar lir ta pai jembi.(Ef 2:7b). Pauli Tsüngremer tenangzükbatem rongsen ngutet aser itemji talubusa agi. Ne taküm nung Tsüngrem tenangzüka ajunga mungutetaka tasümeti teli mesüra maremzükteti teli.

Tsüngremi Pai nangzüka tulu ka agütsütsü akok. Ne Kibuba den jajaang aser mapang nung, Pai ne taküm tajangzü. bener asütsüba nai angutsü akok.

2021 kûm Arogotem taliba longjemtsü nüngdaker: NAE survey

January 11, 2021: America aser World Methodist nung National Association of Evangelicals (NAE)-i yaküm November ita nungi tenzüka survey ka agia liasü, aser iba survey ajanga, 2021 kûm Arogotem taliba longjemtsü nüngdaker ta bushitet, ta Evangelical lenirtemi metetdaksü.

NAE-i sangdong ka ajanga, "November ita nung Evangelical lenirtemi agiba survey nung - election sùlen America nunger Arogotem nung kechi tenüngdaktiba? ta asüngdanga liasü. Telangzübatem rongnung Yisu Khristaji kibur ta mamadoktsüla, osangtajung prokba nung ranglochtsüla, pei tanela jenjang aser lokti tanela jenjang aneptsü tongtibang, ta langzüa liasü. Ajisüaka nisung timtibai langzübaji Arogotem longjemtsü atema liasü," ta metetdaksü.

Yimtenren nung dang masü saka tangatetba tsütsü telemsa tulu adoka aliba mapang ka nung Evangelical lenirtem aikati Arogo longjemtsü atema tayongzüka agüja liasü, aser item lenirtem rongnung NAE Tir, Walter Kim, Evangelical Free Church Tir, Kevin Kompelien, Nazarene Carla Sunberg Arogo nung general superintendent

asur World Methodist Evangelism executive director, Kimberly Reisman nunger densema liasü.

Sangdong ka ajanga Kompelien-i Khristantem dang Efesa tapu 4 nung Paul-i shia aliba Tsüngremer mission indang nenshia metetdaksü.

Kompelien-i, "Arogotemi alima nung Arogo atema Tsüngremer mission nung asentenshir rangloker inyaksüla aser Pai melungba ama yimjung nung longjemtsüla," ta metetdaksü.


Sandberg-ia, Arogotemi ochi nung longjemtsüla aser amalitep alitsüla, ta ashi.

Laisa, "Tsüngremer nüburtem ama asenoki telongjem atema inyaksüla. Lenirtemi Tsüngremer kilirtem ama khuret bena inyaksüla aser akümtsübutep alitsüla," ta ashi.

Salvation Army nungi Kimberly Hodder-ia, "Asen linüki telongjem kanga nüngdaker. Telongjem meliibo America-i tayongzükbatem mekochtetsü. O aser mapa napronglai osangtajung prokba dang nungibo telongjem taliba nüngdaker ta ni bilemer," ta ashi.

NAE survey nung Khristan lenirtem parnok 140-i shilem agia liasü.

OLONG PAITEP # 5691



TIPILEN

1. O jembitsü tashi - 8
5. Sünjang tapu ka - 5
7. Tekanük nung enokba - 5
8. Teka amtep - 5
12. Tzük asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 5690 TELANGZÜBA

TIPILEN :

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

Agüja aliba noksa nung meputepi aliba bushiang



TANÜBO NAI LANGZÜANG

Q. ____ küm Rashtriya Gokul Mission saya.

A.2011

B.2012

C.2013

D.2014

===== (Taruba adok nung onoki langzüksü)

YASHI ADOK TELANGZÜBA : Madhya Pradesh



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesura 4 jelia e-mail : tiriyim@gmail.com nung yokang mesura Tir Yimyim bureau tem nung agüjang.

Tepela Tasoba Anogo



1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

INDIA NUNG GARI TIMTIBA AYOKBATEM: DECEMBER 2020

- | | |
|--------------------------------|--------|
| 1. Maruti Suzuki Alto | 18,140 |
| 2. Maruti Suzuki Swift | 18,131 |
| 3. Maruti Suzuki Baleno | 18,030 |
| 4. Maruti Suzuki Wagon R | 17,684 |
| 5. Maruti Suzuki Dzire | 13,868 |
| 6. Hyundai Venue | 12,313 |
| 7. Maruti Suzuki Vitara Brezza | 12,251 |
| 8. Maruti Suzuki Eeco | 11,215 |
| 9. Hyundai Creta | 10,592 |
| 10. Hyundai Nios | 10,263 |

SUDOKU # 5732

		6	9	2	3			
		2		6	1	3	4	5
	1		4		5	2		6
	3						8	
7	4		5		6			
								9
	6		8		4		7	2
2	8	9	6		7	4		1
	7	4	2		9		6	8

TELANGZUBA # 5731

		3	5	7	4	9	8	1	2	6
		6	8	1	5	3	2	4	9	7
	4	2	9	6	1	7	5	8	3	
	3						7	1	3	
	7	4		5		6				
							2	9	6	
							5	4	8	
							7	6	9	
	6		8		4		8	3	5	
2	8	9	6		7	4		1	7	
	7	4	2		9		9	6	2	

OJANG LUTEP # 5279

- KATAR :
- NDE :
- ANDG :
- SÜMA :
- KASA :
- ARTIL :
- NADE :
- MBATER :
- GLUTYANSÜ :
- NGANMERAG :

OJANG LUTEP TELANGZÜBA # 5278

NÜBUR ASOSHI MAONGKA ARUBABO ANGASHI SAKA
ASANGSANG NUNG TENÜKI MANGU

TAN HOPTA ATEMA - KOMA SÜLA ?

Q. Nagaland nung government mapa nung backward kintem atema reservation ayuba ya kin apia (tribe wise) masü saka kibong nun? senotsü ajangzüktetba apia (economic class) ayu nunga koma süla ?

Olong 20shi nung January 15, 2021 tashi nung iba telangzüba ya onok dangi (e-mail - tiriyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiriyim.in) ajanga yokang. Telangzübatemji taruba Honibarnü adoktsütsü.



January 11, 2021 nü Parliament House, New Delhi nung Lok Sabha Speaker, Om Birla-i National Youth Parliament Festival-2021 finalist tem den jembiba noksa nung angur.

Supreme Court-i Centre dang aluyimba ozüing soita atatsü tuyu

New Delhi, January 11 (Agencies): Centre sorkari junga asüngdangtep mesüi aluyimba ozüing tasen asem benokba atema Hombar nü Supreme Court-i mepelaba lemsatepa, 'Court nem agütsüba temepishiba ken o agütsürtem kati danga item ozüingtem maginer' ta metetdaksü.

Aluyimba ozüing tasen asem dak sendakba nung Centre sorkar aser aluyimertem unions balala nungi lenirtem tsüingda senden tibenbuba amenba sülen Supreme Court-i temepishiba ken o aika angadamba mapang nung Chief Justice, S A Bobde-i aniba bench-i, "Tebilemtsü bentetba telok nung asü tebilemtsü shilem nung adenba telok nung nenok dena aliar onoki mejangjar," ta metetdaksü.

Justice Bobde-i Centre sorkar dang, sorkari item ozüing soita alitsü atema melunga lir asü maliar SC nem metetdakjang, mesüra SC-i item ozüing soita ayutsüsa akümtsü, ta metetdaksü.

Supreme Court-isa sorkar

dang aluyimertem tebilemtsü bentettsü atema committee ka tentetang aser sorkar sentong kechi aliar metetdakjang, ta metetdaksü.

Supreme Court-isa sorkar dang, aluyimertem dak sendakba ozüingji soita ataang, mesüra SC-i soita atatsü, ta metetdaksü.

Bench-isa, court-i longkak aiter aluyimertem nem tetuyuba kecha magütsütsü, kechiyong aluyimertem anema inyakba nung onoki shilem maginer, ta metetdaksü.

Supreme Court-isa, onok nükjidongji telok ana tsüingda ken o bentetdaksütsü atema lir, ajisüaka aluyimba ozüing asem soita atatsü atema Centre sorkari telangzüba magütsür, ta ashi.

Supreme Court-i, "Court-i sorkar dang aluyimba ozüingtem agientsü atema masüingdang. Ya kechi ataloker? State temi nenoki benokba ozüingtem anema nokdaker," ta ashi.

"Sorkar aser aluyimertem tsüingda ken o jembibayim agi onok kanga mepelar," ta

Supreme Court-isa metetdaksü.

Sorkar tenüing nung jembir Attorney General, KK Venugopal-ia Supreme Court dang January 26 nü aluyimertemi tractor rally agitsü renema aliba nokdangdaksüner, ta mepishi.

Ibaji langzüa Justice Bobde-i, Delhi telungi shiba aittsü mesüra shiba maittsü, ibaji court-i lemtettsü makok, iba telemtetbaji police-i agitsüla, ta ashi.

Aluyimertem unions kar tenüing nung jembir, Dushyant Dave-i, aluyimertemi January 26 nü rally agitsü tebilemba mali, ta metetdaksü.

Attorney General-isa Chief Justice dang, SC-i ozüing ka soittsü makok, iba tashiji Executive ket nung lir, ta ashi.

Ibaji langzüa Dave-i Attorney General dang, Rajya Sabha nung item ozüing koma agizükar nai rasaa ashitsü asü, ta ashi. Justice Bobde-ia, SC-i ozüing ka soita ataba aser ozüing ka benoka inyakba nokdangba naji balala; SC-i anapronglaji inyaksü akok, ta ashi.

Maharashtra aser Delhi na densema state 10 nung Bird Flu jangjaogo



January 11, 2021 nü New Delhi nung aliba Sanjay Awatsüing nung horticulture team züingsem kati bird flu tendangtsü atema padak bendenba noksa nung angur. New Delhi nunga bird flu putetogo.

New Delhi, January 11 (Agencies): Hombar nü Union Ministry of Animal Husbandry, Fisheries & Dairies-i, tanü tashi nung state 10 nung Bird flu aliba jangjaogo, ta metetdaksü.

CAR-NIHSAD-i Rajasthan kübok Tonk, Karauli aser Bhilwara district tem aser Gujarat nung Valsad, Vadodara aser Surat district tem nunga

Bird flu aliba jangjaogo. Iba dak alia Uttarakhand nunga Kotdwar aser Dehradun district na nung aser Delhi nunga Sanjay Lake areas nung waro aser padak asüba jangjaogo, ta Ministry-i sangdong ka ajanga metetdaksü.

Maharashtra nunga Parbhani district nung aliba poultry ka nung aser Mumbai,

Thane, Dapoli aser Beed nunga bird flu aliba jangjaogo.

Iba wara nokdangtsü atema Haryana nungbo an jenti tepseta indokdar. Hombar nü Central team ka Himachal Pradesh tonga oa Panchkula semdangogo aser parnoki bird flu dak sendakba wara bushisüingdangtsü, ta kasa sangdong nung shia lir.

OFFICE OF THE AKHOYATSÜR TELONGJEM DIMAPUR

Dimapur - 797112 : Nagaland

AKHOYATSÜR TELONGJEM-I TENÜNGSANG AGÜTSÜR

Wb. Mapuyanger Jamir aser Wt. Alemkokla Lemtur na jala **Kr.Moamongla**, Baptist Graduate School of Theology and Mission College nungi "Academic Excellence Award in Christian counseling department" takok konang ngutetba atema Akhoyatsür ajaki tenüingsang agütsür ano maneni la wadang nung Tsüingremi temoatsü aser azükaro tendakjangni ta sarasademtsür.

Sd/-
Aienla Jamir
President, ATD

Sd/-
K. Tainla Imsong
Secretary, ATD

India-i apuba China nunger sepai ka chiokogo

New Delhi, January 11

(Agencies): January 8, 2021 nü Ladakh anüdoklen Indian army temi China nunger sepai (People's Liberation Army) ka pua liasü, ajisüaka Hombar anepdang 10:00 ako nung Chushul-Moldo arrtsü nung China nem meyipa agütsüogo.

Yaküm May ita nungi linük ana sepaitem mangatettep adokba tesemlen China nunger sepai kati memeteti India litsü telungi aitba sülen India nunger sepaitemi pa pua liasü.

Honibarnü Army-i sangdong ka ajanga, "PLA sepai ka LAC adena aitba sülen India nunger sepaitemi apu," ta metetdakja liasü.

China yimtiba, Beijing nunga China sepai ketdangsertemia par sepai ka China-India arrtsü adena aoba osang sangdonga liasü.

PLA website ajanga, "Hokolbar anepdang yakta kanga tammang asüba aser tesem junga mejangjaba agi Chinese People's Liberation Army frontier nungi sepai ka nemzüa arrtsü adena ao," ta metetdaksü.

October ita nunga India nunger sepaitemi PLA sepai, Corporal Wang Ya Long, Demchok sector nung pua liasü saka anogo ana lir Chushul-Moldo arrtsü nung China nunger nem meyipa agütsü.



Patna, January 11, 2021: Hombar nü Patna nung National Security Guards (NSG) sepaitemi Republic Day parade atema renemshiba noksa nung angur.

India nung nisung 96 dak Coronavirus tasenba putetogo: Health Ministry

New Delhi, January 11 (Agencies): Hombar tashi nung India nung nisung 96 dak UK nung tama putetba coronavirus tashidak tasenba putetogo, ta Union Health Ministry-i metetdaksü.

Anogo shia India nung coronavirus tashidak putetba tajemba akümba mapang nung Covid-19 tashidak tasenbabo timba putetdar.

Taoba Mongolbar tashi nung linük nung coronavirus tashidak tasenba ya nisung 58 dak dang puteta liasü, Bodhbar tashi nung 82 aküm aser

Honibar tashi nungbo 90 aküm. Iba tashidak puteta alirtem state temi health facilities balala nung temeja takdang nung quarantine süa anepaludar, aser parnok ajurua alirtem contact tracing süa quarantine südar, ta health ministry-isa metetdaksü.

United Kingdom nung tama putetba coronavirus tashidak tasenba ya Denmark, Netherlands, Australia, Italy, Sweden, France, Spain, Switzerland, Germany, Canada, Japan, Lebanon aser Singapore linüktem nunga putetogo.

Hindu Mahasabha-i Nathuram Godse indang kaketnang ka semzük

New Delhi, Aenjeti/January

11 (Agencies): Amongnü Madhya Pradesh kübok Gwalior nung Hindu Mahasabha teloki linük tebuti, Mahatma Gandhi khasetsang, Nathuram Godse indang kaketnang (study centre) ka semzükogo.

Hindu Mahasabha teloki sangdong ka ajanga, "Iba ya lanurtem nem India lemsaba indang metetdaksütsü aser Maharana Pratak ama nüngtugu nisungtem indang metetdaksütsü nükjidong nung

lapok," ta metetdaksü.

"Nathuram Godse 'gyanshala' ji ajanga lanurtemi India lemsaba indang lenla balala nungi metettsü aser Guru Gobind Singh, Chhatrapati Shivaji Maharaj aser Maharana Pratap nunger ama linük lenirtem indang metettsü," ta Hindu Mahasabha national vice president, Jaiveer Bhardwaj-i osangbenertem nem metetdaksü.

Paisa, 1947 küm India ana küma lemdangbaji Congress tai ajanga lir, ta ashi.



Aenjeti/January 11: Coronavirus mechi asemben buba linük ajunga shibangba atema Israel Ato Kilonser Benjamin Netanyahu anema Jerusalem nung par ki anasa longkak aitba mapang longkak aiter kati ajem tuluka amer aliba noksa nung angur. Mangatettep agi sünga aliba ato kiloner anema ochimashi ken o benoka lir aser nüburtemi pa menden nungi alutsü akhanger.

WHO nungi mongintemi China nung coronavirus poktetba bushitsü

Beijing, Aenjeti/January 11 (Agencies): Coronavirus tashidak wara poktetba bushisüngdangtsü atema WHO nungi mongintem linüki Brehostibarnü arutsü lir, ta China-i Hombarnü ashiba ajanga iba maparen atsülangba aser menudaktsüba atema World Health Organization ajanga aija aruba tatem kati arudaktsür. WHO nungi mongintemi January 14, 2021 nü China semdangtsü, ta China indang National Health Commission ajanga ashi.

Iba telok yagi China aser talisa taoba küm December ita virus poktetdak tesem, Wuhan semdangtsüba maparen ya tongtipang teinyaktsü ka akum, aser Beijing-i züngsem 10 agi akumba telok ya Wuhan-i arutsü temelaba magütsüi lia aru. Wuhan-i parnok arutsü atema

mapang tejangja tang jembishinüba mapang lir, ta National Health Commission (NHC) indang deputy head, Zeng Yixin-i January 9 nü osangbener dang shia liasü.

Video conference pezü agia China aser World Health Organization (WHO) tsüngta bushitsüngdangtsü atema tangatetep kati aruogo. WHO nungi mongintem maparen tembanga mapang latetba sülen China nungi mongintem Wuhan-i parnok den külemi oa bushisüngdangtsü, ta Zeng-i ashi.

China busemer ta mapang shia tai tonglokja arusang, WHO tekolakba, Tedros Adhanom Ghebreyesus-i mongintem arutsü atema temelaba magütsüba atema Beijing tenüng asenba sülen Hombarnü iba osang ya sangdonger.

"Iba osang angashia ni kanga mepelar, züngsem an abo apusogo aser dangartem mapangtong nung mesenzüteter, saka China ketdangsur den osang agitepa aru," ta pai ashi.

Iba mission ya UN health agency atema tongtipangtiba mapa lir aser akok tashi tekeratiba nung mapa tenzüksü yongya liasü, ta Tedros-i ashi. China-i WHO mongintem arutsü atema mapang atsülangba ajanga alimai COVID-19 poktetba tsüngsü aputsü merangba nung Beijing-i tetsükdaktsü agütsür, ta linük balalai ola adoker.

Iba tashidak wara ya Wuhan nung takum shiruru, ozüsangnu ayokdak pokteta nisung dak mena, ta China-i ashiba nung nisung aikati temolung malemer. Iba shishilempaba tesem ya taoba küm tetenzüklen nungi shibangja lir.

UN Secretary-General Antonio Guterres-i kümsük tanabuba inyakner

Geneva, Aenjeti/January 11 (Agencies): Deobarnü United Nations Secretary-General Antonio Guterres-i Security Council nung permanent züngsem pongu dang pai kümsük tanabuba inyakner ta Deobarnü ashi, ta iba inyaknim meteta alir anati ashi.

Taoba mapang Portugal nung ato kilonser inyaka alisang Guterres-i iba osang ya UN General Assembly indang tir nem yakta osang agütsütsü akok, ta diplomats ana yagi tena tenüng memettdaktsüi ashi, kechiaser iba telemtetba ya yimjak nung ano mesangdong.

Arishi küm 71 tain, Guterres-i küm pongu kümsük atema 2017 küm January ita office nung amen, koba taküm küm tatami tembangtsü lir. Guterres, shibai yimjak nung US Tir, Donald Trump anema ola madoki lia arur, pai iba telemtetba agitsü atema November 3 nü US election agiba osang ataa liasü, ta diplomats ana yagi ashi.

Guterres indang odongtari iba dak sendakba nung asüngdangba nung telanzüba agüja mali.

Trump lenisüba kübok US-i UN aser iba indang tentet balala den aiben mangatetep adoka arua World Health Organization nungi anen aser linük balala senteper Iran nuclear tezüngzüktep samatsü meranga Security Council züngsemtem ain adokdaktsü. Tir inyaktsü shimteta alisang Joe Biden-ibo WHO dangi tanaben meyipa arutsü, Iran tezüngzüktep yanglushitsü aser Paris climate accord nung tanaben adentsü



merangtsü, ta nangzüka lir.

Guterres-i tzü-mopung melenba atema kanga nendaka inyaka arua linük balala dang carbon emission ajemdaktsütsü atema bendanga agütsür inyakdaktsütsü meranger. Biden indang administration ajanga tzü-mopung atema temolung agüja inyaktsü, ta yimya agi sayuogo aser pai UN ambassador atema shimteta alisang Linda Thomas-Greenfield ya continent pezü inyaknim nung takotet ka lir.

Tang tesüsa inyakner UN tekolak temi kümsük ana-na inyaka arua lir, aser P5 ta ajaba Russia, US, UK, China aser France linüktemi pa busemstü akok, ta diplomats temi amanger. Nisung meimchir temeden wazüka meyutetba atema alima nung tashi tait linüktem dang kecha mechitetba atema Guterres ya aija liasü, aser China tashi tuluba akumba mapang Trump-i iba tentet nungi pilaba ajanga UN nung makmak-shimak agi sünger liasü.

UN tekolak ka shimba yimya dang opaque ta ajar, kong permanent member (linük) pongui tashi amshia shimer, saka 2016 election nungbo miimshia meshim. Aikati UN dang tetsür nema anidaktsütsü ashir.

Democrats temi White House nungi Trump agentsü meranger

Washington, Aenjeti/January 11 (Agencies): Taoba hopta Capitol telungi nüburtem aita rongrong adokba dak sendakba nung Tir Donald Trump shilem aliba mechi US House Speaker Nancy Pelosi-i Vice-President Mike Pence dang tir ya office nungi agentsü ajungshi tenzüko.

Trump ya tir inyaktsü metemsü ta sangdongtsü atema Pence dang 25th Amendment benokang ta ashitsü asoshi ozüng yanglurtemi pangzüng ka yanglutsü sentong lir.

Pence-i iba mera agitsü memolunger, ta ashir.

Pai memolungra Democrats temi Trump mapa nungi anentsütsü atema vote agütsüteptsü, shibai pa busemer dang Capitol-i aotsü ajungshia liasü.

Kuli tejangja magütsüteni vote agütsüba mapang ashikülak mapa inyak, ta jembia aruba sülen Trump-i rally ka nung jembiba ajanga Democrats aser Republican

temi rongrong atema Republican tir dak tai tongloksür. Iba lendong nung Capitol police officer ka dena nisung pongu asü.

Twitter densema social media sapang aika nungi Trump ya Hukulbarnü nokdangba süken pai yimjak nung osang kecha sangdonga mali.

January 20 nü Democrat telok nungi Joe Biden tir ama mapa agizükba mapang Trump-i office yutsür aotsü lir. Biden tenangzüktep agiba sentong nung pa bo madentsü, ta Trump-i shia lir.

Pence dang Constitution nung aliba 25th Amendment benokang ta mepishitsü atema House of Representatives ajanga Hombarnü pangzüng ka benoktsü akok, ta Pelosi-i ozüng yanglur dangi zülü. Iba Amendment ya ajanga Pence-i White House nungi Trump agentsü atema tashi agütsütsü aser pa khen atema tir inyaka alitsü.

Iba pangzüng atema House nung Mongulbarnü vote

agiteptsü akok. Iba sülen Pence aser cabinet nem mera agitsü atema ghonda 24 agütsütsü aser aji meinyakra tashiyim agi mapa nungi anentsütsü atema House-i mera agitsü.

"Onoki arsaanga mera agitsü, kechiaser iba tir ya ajak atema timtem lir. Iba Tiri anir asen democracy mezüngmeshia amshiba tali tamajungba akumer aser iba atema tekeraba nung mera agitsü nüngdaker," ta Pelosi-i Deobarnü züluba shidi nung shia lir.

Pence ya pasasa tir nungi pila aor ama sayua Biden inauguration nung adentsü ta Deobarnü shiaka pai iba amendment benoktsü renemba majiteter.

Pennsylvania nungi Republican senator Pat Toomey-ia, akok tashi tekeratiba nung tiri mapa nungi anener aotsüla, ta ashi. Kasaji Alaska nungia Lisa Murkowski-i shia liasü.

House Democrats temi tekeratiba nung tir mapa nungi anentsütsü atema inyakteptsü,

ta nangzüka lir. Tang aliba ken o nung Trump mapa nungi anentsütsü atema Congress nung taitzüba ken o benoktsüla aser iba atema Trump anema Democrats temi ken o benoktsü, ta Pelosi-i ashi.

Ozüng yanglur kati ashiba agi, Trump menden nungi atsüngdoktsü atema House nung hopta tiyongtsülen vote agiteptsü akok. US nungi puti otsü nung tir ka anaben tashi mapa nungi anentsütsü merangbabo Trump ya kisüng asütsü.

Iba sülen ken o angadanga jembitsü atema Senate-i aotsü, kong tir menden nungi atsüngdoktsü atema vote asemsü kuma lemsar shilem ana nüngdaker. Pa aitsüra Senate-isa tarutsü nung Trump-i sorkar mapa meinyaktsü atema vote ka agütsütettsü akok.

Ajisüaka Democratic party nungi lenir aser House whip, James Clyburn-i osangbener dang ashiba agi, Biden office nung mener anogo 100 majung tashi par teloki Senate dangi

article kecha meyoktsü akok. "Tir inyaktsü shimteta alisang Biden nem pa sentongtem inyakttetsü atema nüngdakba ama anogo 100 agütsüti."

Iba ya ajanga Biden indang cabinet tasenba junga amenoktsü aser coronavirus azüoktsü densema tongtipang sentongtem tenzüksü, saka Senate nung Trump menden nungi atsüngdoktsü atema ken o benokra item sentongtem meinyaki atatsüsa akumtsü.

Trump-i mapa meshidak inyakba nung aitsütsü atema vote agütsütsü, ta Republican senator katia shia mali. Tir menden nungi atsüngdoktsü atema mera agiba ya "politically-motivated" ka lir aser iba ya ajanga asen linük nung telemsa tali adoktsü, ta White House aser Republican lenirtemi ashir.

Biden-i mapang talangka nungi Trump tir inyaktsü metemsü ta bilema aruaka pa mapa nungi anentsütsü atema Congress ajanga telemtetba agitsü, ta ashi.

India nung Vivo Y51A smartphone saya

New Delhi, Aenjeti/January 11, 2021 (Agencies): China indang smartphone yangluba company, Vivo-i Hombarnü (11.01.2021) Vivo Y51A ta nungja agütsüba smartphone tasen ka India nung sayaba sangdongogo. Iba smartphone nung 48-megapixel primary rear camera, 5,000mAh battery aser Qualcomm Snapdragon 600-series processor inoka yanglutsüogo.

India nung Vivo Y51A - 8GB RAM + 128GB storage variant jenjang sen 17,990 alitsü aser Vivo India E-store, Amazon, Flipkart, Paytm Mall, Tatacliq, aser partner retail store tem ajanga angutsü. Iba variant den, Vivo Y51A ya sentsü tapu ana - Titanium Sapphire aser Crystal Symphony nung angutsü.

Vivo Y51A nung 6.58-inch FHD+ IPS LCD display den Vivo's Halo FullView technology inokja lir, koba

January 16 nungi Film Bazaar tenzüksü

Mumbai, Aenjeti/January 11, 2021 (Agencies): Kanga dang yongya ataba 'Film Bazaar', koba National Development Corporation of India (NFDC) ajanga ayongzüksü, iba sentong January 16 nungi tenzuka January 20, 2021 tashi virtual ajanga agitsü.

Iba sentong November 20, 2020 nü agitsü renemer liasü, saka Covid-19 tenokdangba ajanga anogo atsülangtsüsa aküm. Tapan kum Bazaar sentong ya International Film Festival of India den külemi agia aru, koba taküm Festival ya telok densema agitsü asadangdar. Iba Festival sentong ya Bazaar den külemi January 16 nü nungi tenzüksü.

Co-Production Market atema Bazaar-i project 21 shimogo aser item rongnung projects 17 shi South Asia (India, Bangladesh, Nepal and Sri Lanka) aser linük talisa China, France aser Canada nungi lir.

International collaborations nung Onir (We Are, with Canada), Paromita Dhar (Last Time On Earth, with France) aser Pradip Kurbah indang (The Elysian Field, with China) dena lir. Iba den külemi sentong nungsa Anjali Menon (Ustad Hotel) aser Haobam Paban Kumar (Lady Of The Lake) nungeri shilem agiba angutsü.

Kasa sentong nung, feature film 129 densema film 195 sayatsü. Item rongnung film 20 tashi 'Film Bazaar Recommends' ama sayutsü.

Maneni, Work-in-Progress Lab nung project pungo sangdongogo, kong Eeb Allay Ooo! and The Mountains dena lir. Iba project ya Sundance sentong nung sayatsü shima liasü.

Qualcomm indang Snapdragon 662 chipset den 8GB RAM aser 128GB internal storage nung angutsü. Memory ulua aginürtemi microSD card ka ajanga 1TB tashi atsülanga amshitetsü.

Y15A smartphone ya Vivo indang FunTouch OS 11 - Android 11 ajanga achaayangtsü. Iba den bendenloksema, Vivo Y51A nung 5,000mAh battery ajanga tashi agütsür, koba 18W fast charging nungitter. Iba smartphone ya India nung yangluba product ka alitsü aser Uttar Pradesh kübok Vivo indang Greater Noida facility nung yanglutsüogo.

Optics tsütsü repringdangra,

Vivo Y51A tesülen triple camera setup ka angutsü, kong 48-megapixel primary sensor, 8-megapixel wide angle lens aser 2-megapixel macro lens dena lir. Selfie jangrar atema, Vivo Y51A tejaklen 16-megapixel selfie shooter ka angutsü. Iba den külemi camera inyakyim den yaritsü atema Vivo Y51A nung feature balala talisa, Ultra-Stable video angutsü, koba Electronic Image Stabilisation (EIS) ajanga yarir aser tejaklen aser tesülen camera anaprongla atema Super Night Camera mode angutsü aser ibajagi ola ajemdaktsür aser tesangwa peria malidak noksa tajungba tangoker.

MULUNG NEN O

Late. Sangermongla Mopungchuket
Tasoba : 17.05.1949 - Tasüba : 16.12.2020

Onoki kodanga amatsü makokba ojala **asür Sangermongla** (Mopungchuket), iba alima nungi Tsüngrem-i jar aoba mapang kija, telok aser yimer yimsanger shirnokisa ozü asüku mapang arua rongsen, nübu, shisatsü, sarasadem agi yariogo. Takoksang Tsüngrem-i nenok ajak talubusa moajang ta sarasademtsür.

Temeim kinüngbo, chirnurtem
aser kinüngertem



MENUNGRA BILEMTETER



Lt. Imatsungba

Temeim obala sür tanü (12.01.2021) kum ka ajungba anogo, Tsüngremi len ania aser kinunger ajunga anema toktsü nung Pa tenüng asanger. Tanü obala meliaka pa temeim mapa, sayutsüngi o aser teti onok asoshi sarasademtsüba bilemteter. Pai toktsüba tsüngsü tajung aser milen tesangwa onok mulung nung teti alitsü. Amen.

Temeim Chirnurtem, Semchirtem aser Kinüngertem.

Office of the

Longmisa Senso Mungdang

B.P.O Longmisa: P.O. Mokokchung, Nagaland

TENÜNGSANG AGÜTSÜR

Longmisa Senso Mungdang ajanga nübur tenzükba wadang nung jenjang temabai atur Shri. J.Kikatemtsü, (promoted to Head Master, under Education Department Nagaland), aser Smti. Temjenchila W/o Shri. Nungdokwati (promoted to Superintendent under Directorate of Geology and Mining Dimapur, Nagaland), tena nem tenüngsang tetushi agütsür.

Maneni tarutsü anogotem nübur asoshi tenzükba wadang tejakleni aoba nung shilem tulu agir kaka sūdakjang ta mungdang sarasadem.

Sd/-
Satemkaba
Mendenbuba

Sd/-
Alemchuba
Tongti Zülur

SANGDONGER

27th Jan. 2020 anogo Khensa Ladong Semchir-i Lt Merensangba nungi jakzükba ajak kimong lumong nung medendaktsür ta sangdongba 24th Dec. 2020 anogo meyipa agi.

Sd/-
1. Marsosang
2. Temjennungsang
3. Lanuyabang

WB. TEMSÜCHIBA LONGKUMER (MOLUNGYIMSEN) ARISHI KÜM 100 AJUNGBA ANOGOMONG



Tanü 12th January 2021 nü onoki kanga dang meimba tsürapur **Temsüchiba Longkumer** arishi kum 100 ajunger. Pa ya 1937-1940 tashi Molungyimsen Baptist Arogo nung Pastor inyaksang Wb. Yonkongnungsang'er jabaso lir.

Centenary abensar tsürapur Temsüchiba Longkumer-i taoba mapang Molungyimsen Baptist Arogo nung Deacon inyakogo aser yimdak lenisüba mapa balala nung shilem agia aruogo.

Tsürapur Temsüchiba Longkumer ya Sarasadem nisung, O tanük jembir ka, aria bilemtsür ka, kanga dang molungso, aser Tsüngrem meimba nisung ka lir.

Ozü tsürapur Temsüchiba Longkumer kum 100 abensaa arishia anema yutsüba aser tanü shisatsü agütsüba atema onok, par chirnur, Semchirsemnur aser Kinüngertem Tulusang Tsüngrem nem Tetushi aser Tenüngsang agütsür.

Tsüngremi maneni tsürapur taküm
moajangma. A men

MULUNG NEN O

Tasoba : 4th Feb. 1955 - Tasüba : 6th Jan 2021

Tsürapur asür **Nokchasangla Amri** shirangba mapang nungi asüba anogo tashi kionger, yimeryimsanger aser bendanger ajaki nubu, rongsen aser sarasadem agi yaritepba aruba atema kanga pelaba iba zülü ajanga lemsateper.

Tsüngrem takarsangi nenok kija, kibong maneni moajang ta ozü sarasademer.

Temeim kinüngbo, chinur,
semchir aser adianutem.



Office of the
Soyim Shisaluyimer Telongjem
Platinum Jubilee (1945-2020) Ungma,
Mokokchung: Nagaland

Pelaba Lemsateper

Soyim Student' Union Platinum Jubilee mong takok ngua agitettsüsa kija, telok aser union kwinakati lenmang balala ajanga nungita yariogo, nenok ajak dang Soyim Student' Union Platinum Jubilee Committee-i pelaba metetdaksür.

Onoki item nübo dang alakteta pelaba shisemer:

1. Mr & Mrs. Sharingain Longkümer, NLA
2. Mr & Mrs. Tongpang Ozukum, Minister, Mechanical and Housing, Govt of Nagaland.
3. Prof. & Mrs. Temjensosang Imsong, HOD, Dept. of Sociology, Nagaland University.
4. Mr & Mrs. Imtitoshi, SP Wokha,

nenoki tenla tajung agütsüba aser tsüngdong aruagi adenba ajanga iba Jubilee sentong tali mera ketdakja aser tepor jungdaktsüogo. Iba Jubilee sentong takok angutsü asoshi meranga inyakba atema Ungma Village Council, Ungma Baptist Arogo aser sub-committee züngsem ajak dang Union-i alakteta pelaba metetdaksür.

Nenok kija shia dangi tsüngdong aruagi onok pelaba melemsatepteter, saka nenoki shilem tulu agiba onoki pelashishia agizüker aser tarutsü nunga nenok wadang nung tajung Tsüngremi tali moajangma ta Union-i sarasademtsür.

Sd/-
Takotong Longkumer,
Convenor,
Jubilee Planning Committee

Sd/-
N. Akok Longkumer
Secretary
Jubilee Planning Committee



Dimapur Molungyimsen Fellowship-i Mongsenyimti Baptist Arogo Pastor, asür Imli Ozüküm kibong den külemi asükhu mangyim jashi lemsateper.

Pai inyaka doktsüba mapa tajungtem onoki kodanga mamatsü.

Sd/-
T. Lipok Aier
Chairman, DMF

Sd/-
Lima Tzudir
Secretary, DMF

1st Mkg Town Assembly Constituency Football Tournament asayar



27 Mokokchung Town AC (NDPP), President, C. Tia Longkumer-i 1st Mokokchung Town Assembly Constituency Football Tournament lapoktsüba mapang tangokba noksa nung angur. Mokokchung, January 11, 2021.

Mokokchung, Jan 11 (TYO): Mezüngbuba 27 Mokokchung Town Assembly Constituency Football Tournament ka Jan 11 nü yangi Imkongmeren Sports Complex Mokokchung nung 27 Mokokchung Town Assembly Constituency (NDPP), tir, C. Tia Longkumeri meraket tenzüksüogo.

Iba asayamung ya 27 Mokokchung Town Assembly Constituency (NDPP) Youth Organization-i "physically stronger" omen nung ajemdaker constituency nüburtem kati ka metetpelatepba den lungjema alitsü nükjiong yur ayongzük.

Iba asayamung nung team 6-i shilem agitsü aser item team-ji 27 Mokokchung Town A/C kübok aliba ward; Aongza, Mongsenbai, Kümlong, Kichitip, Salangtem aser Assembly Constituency ta sür team ka densema lir. Mokokchung District Football Association-i iba asayamung nung technical support agütsütsü.

Iba asayamung nung takoker mezüng jenjang angur nem

senpet sen 20,000/- den trophy aser tanabuba jenjang nem sen 10,000/- agütsütsü. Iba den ano nija (individual prizes) senpet; best keeper, promising player, highest scorer aser best player amala shimsü, ta tayongertemi metetdaksü. Iba asayamung ya Nagaland Minerals & Mines, Proprietor, Temjenmoa Jamir-i senotsü teyari tulu agüja katsüba asoshi tayongertemisa pelaba lemsatop.

27 Mokokchung Town AC (NDPP) tir, C. Tia Longkumeri jembidang, tanü covid-19 wara ajanga asenok ajak arentaka aliba mapang ka temang arakzüa tangu satoktsü aser sempet aketeritem nem sabang lapoktsütsü asoshi iba ama sentong tajung yangertetba asoshi lanurtem dang pelaba lemsatepa liasü.

Tanü nüngtugu asayartem otsü reprangdangra, parnok ajak ya mezüng nungi nüngtugu akümba masü, saka tournament tila nungi tenzüka asayaa atuba angur, yamaji iba asayamung nung shilem agirtemi tarutsü nung tournament tulu nung

shilem agitettsüsa nükla yur asayatsüla. "Football asayatsü atema tasa (skill) kisüing masü saka merangba den tazüokba nungdaker, ta paisa asayartem ajungshi.

Iba tournament ya Mokokchung town kisüing atema masü saka Mokokchung district aser state rangben asoshi temoatsü ka asütsü aser tanü metsü tila ka perokba ajanga iba nungi süngjang tajung jenti atangtsü asoshi paisa moatsü. RD Minister, Metsübo Jamir'r kibongi iba asayamung katettsüsa teyari tulu agütsüba asoshi paisa pelaba lemsatop.

Tanep asayamung tetenzük sentong nung Mokokchung Town Baptist Arogo Youth Evangelist - Monglir, 27 Mokokchung Town A/C (NDPP) Youth Organization President - Imliyanger, General Secretary - Takonungsang aser 27 Mokokchung town A/C Women Organization President - Meyila Jamir parnokia shilem balala agia liasü. Iba asayamung ya Jan 14 tashi asayatsü.

Chennaiyin-i Crivellaro melena Lanzarote alizükogo

Aenjeti/January 11, 2021 (Agencies): Chennaiyin FC-i, mapang tatsüka atema tang asayaa aliba Indian Super League (ISL) 2020-21 season asoshi Spanish midfielder Manuel Lanzarote alizükogo.

Arishi küm 36 tain asayar ya Goa-i aotsü aser squad den maden tsüngda quarantine asütsü. CFC captain Rafael Crivellaro tetsür yirua season tepeyong masayatetsüsa akümba sülen Lanzarote anisemogo. ATK Mohun Bagan den December 29 nü asayaba mapang Crivellaro yirua liasü.

"ISL anaben tashi koker aliba club ka nungi asayatsü maongka anguba atema ni kanga pelar. Mapang tatsüka dang süka kü tajagshibatam ajanga teyari agütsütsü aser külem asayartem nükjiong tongdaksütsü atema teyari agütsütettsü imlar," ta Spain nunger asayar yagi ashi.

"Lanza (Manuel Lanzarote)

ya asayar tejen ka lir aser pa taoba mapa India nung asayaogo. Onoki pa takaratiba nung arua adentsü aser play-offs atema meranga asayatsü imlaa atar. Mapang tatsüka atema dang süka onoki pa club-i pelashishia agizükur aser nükjiong atongtsü atema külemi longjemer inyaksü yongyaa atar," ta CFC Head Coach Csaba Laszlo-i ashi.

Laszlo aser Chennaiyin FC-i, Lanzarote ISL nung asayaba tajangshibatam takok tashi amshitsü imlar. Pa 2017-18 nung FC Goa nungi aser 2018-19 nung ATK nungi asayaogo aser iba mapang pai Goa team semifinal tonga aniogo, kong aggregate nung parnoki CFC makok. Iba sülen taruba season nung pa ATK nung oa aden aser pa captian kümdaksü. Pa lenisüba kübok parnok Super Cup semi-finals tonga asaya saka Chennaiyin-i tsükdaksü.

Tasa tajung aketba aser goal

idaksütsü jangraba asayar ka ama Lanzarote-i, midfield nung kanga junga asayateter. Pa Anirudh Thapa, Lallianzuala Chhangte aser Jakub Sylvestr nunger den kanga junga angatettepa asayatsü imlar. Lanzarote-i tang tashi nung ISL asaya 33 nung goal 18 idaktsüba den assist 8 süja lir.

FC Barcelona youth rank nungi atuba asayar ka ama Lanzarote, Spanish lower divisions nung club aika nungi asayaba sülen top-flight nung 2013 nungi 2015 tashi RCD Espanyol nungi asaya. Iba sülen pa India nung masaya tsüngda Greek club Asteras Tripoli nungi asaya aser Spain nung Real Zaragoza nungi asayaa liasü. Tatamsa pa CE Sabadell FC aser UC Sant Andreu nungi asayaogo.

Chennaiyin FC pur Brehostibarnü (January 13) Odisha FC den GMC Stadium nung asayatsü renemdar.

BCCI-i aser asaya taa aser asayamung ayonga asayaba taa ajungkettsü

Aenjeti/January 11, 2021 (Agencies): BCCI-i Deobarnü Syed Mushtaq Ali Trophy ayogzüka asayaba state trok indang association taa sen lakh 2.5 aliba nungi 3.5 kümtsütsü atema telemtetba agiba den asayartem taa 50,000 nungi 75,000 kümtsüogo.

T20 asayamung koba Deobarnü tenzükogo, iba asayamung ajanga India nung domestic season tenzükba sayur, koba COVID-19 wara poktetba ajanga ita aika masayateti aruogo.

Asayamung ya yimti trok nung bio-bubble kübok asayadar aser iba ajanga asayamung ayongzüka asayaba state association tem senotsü tali indoker.

"Tawa Ahmedabad nung AGM mapang asayamung ayongzüka state association tem nungi parnok tebilemba angdangba den BCCI nung

külem lenirtem den sensakasemba sülen ni 2020-21 season atema Syed Mushtaq Ali T20 asayamung asoshi tang sen 250,000 agüja aliba sen 350,000 kümtsüba sangdonger," ta BCCI secretary Jay Shah-i shiti ajanga asayamung ayongba state association tem nem osang agütsü.

Iba asayamung atema team tem telok trok küma lemsar lir; Elite pongu aser plate ka aser league asayatem ajak Vadodara, Indore, Kolkata, Chennai aser Bengaluru nung asayatsü aser knockout asayatem ajak Ahmedabad nung asayatsü.

"Maneni asayamung nung asayaba taa sen 50,000 aliba nungi 75,000 kümtsüogo.

"Asayamung ayongzüka state association aser asayamung nung shilem agiba team tem nem teyari agütsütsü atema item jenjang ya agiogo," ta Shah-i ashi.

India vs Australia: Tasembuba Test draw nung tembang

Sydney, Aenjeti/January 11 (Agencies): India aser Australia na tsüngda tasembuba Test asaya Hombarnü draw nung tembangogo.

Asaya akoktsü asoshi run 407 nüngdaka India team batting amen tenzük aser Pant (ball 118 nung run 97) aser Cheteshwar Pujara (ball 205 nung run 77) na senteper run 148 yanglu, saka run memenepi over 131 nung asayar pongu out ser run 334 dang yanglutet aser asaya draw nung tembang.

Team anapronglai tang tashi nung asaya kaka koka lir aser Brisbane nung asayatsü aliba Test ajanga takoker bendangtsü.

Test tasembuba nung Pant-i kanga tasü ita asayaba mapang talangka bilemtettsü saka Ashwin (ball 128 nung run 39 no) aser Vihari (ball 161 nung 23) nati kanga junga asayaba ajanga asaya küzmzüktetogo.

Pat Cummins (26-6-72-1), Josh Hazlewood (26-12-39-2), Mitchell Starc (22-6-66-0) aser Nathan Lyon (46-17-114-2) nungeri akokba tashi tasa ajak amshia ball aon saka wicket magiteti liasü.

Ashwin aser Vihari nati over 42.4 nung run 62 yanglu aseri ba ajanga Rahul Dravid sor küm 48 ajungba nü pa kanga nema dangdaksür asütsü.

Vihari hamstring yiruba ajanga kanga timtem liasü saka kanga ajang ajanga nokdangogo, kasa mapang nung Ashwin-a ball agi aiben temang nung ondaksü saka kanga tasü ita nokdak.

Asaya nung Pant-i ball 118 nung four 12 aser six asem azük. Nathan Lyon den kanga toktepa asayaba sülen tatamsa ball züktoktsü merangba mapang Lyon-i Pant out sütsü. Iba sülen Pujara-a, Josh Hazlewood-i ball tajung ka ona out sütsü.

Vihari melena Pant tama yok kechiyong iba track nung mezüngbuba session nung asaya tembangdaksütsü atema dang asayaba ajanga teyari magütsütsü aser kasa mapang nung left-right combination nüngdaka liasü.

Pant-i mezüngbuba ball 35 shi tenokdang dang nokdang saka iba sülen Lyon indang over ana asemka nung pai six ka aser four asem züka liasü.

Iba sülen Tim Paine-i, Lyon idang end Randwick nungi Paddington-i melentsü ajisüaka temelenshi kecha makai six ana tashi zükdaksü.

Pant-i ajungbena boundary azük tenzüka sülen Paine-i Lyon indang end tanaben 'Randwick'-i melentsü. Kasa mapang nung Pujara-a pa dak temulung lemteta Lyon indang ball ka mid-wicket leni züktoka liasü.

Pant-isa, Mitchell Starc-i aonba ball aika boundary züka liasü. Pa anaben tashi out asütsü nungi jenboa liasü. Lyon-i ball aonba mapang Paine-i catch ka drop asü.

Pant aser Pujara na senteper mapang talangka kanga meranga nokdak aser tena sülen maneni Vihari-i Ashwin nati kanga junga asayaa asaya draw nung tembang.

BILEMDANGANG

"Tangari kechi ashitsü ta bilemba nung mapang tintok."